

毛

詩

多

識

毛詩多識卷七

長白多隆阿著

幽風

有鳴倉庚

毛傳云倉庚離黃也孔疏云倉庚一名離黃卽葛覃黃鳥是也爾雅釋鳥云倉庚商庚倉庚一作鷦鷯離一名鷽一作鷽詳見葛覃

爰求柔桑

鄭箋云柔桑穉桑也蠶始生宜穉桑此卽桑葉始生者桑成大樹發葉較遲在野之桑未成樹萌芽略早可求也芽始成葉故曰柔

采芣苢

毛傳云芣苢白蒿也所以生蠶孔疏云爾雅釋草云芣苢蒿孫炎曰白蒿也傳於采芣苢曰皤蒿此云白蒿變文以曉人也白蒿所以生蠶此蓋言芣苢可以生蠶非言芣苢飼蠶集傳誤會毛說乃云蠶生未齊不可

食桑故以繫啖之豈知蠶不可以食繫哉蠶子未生古者采繫以浴之此術今已不行詳見采繫

八月萑葦

毛傳云萑爲萑葭爲葦豫蓄萑葦可以爲曲也曲一作箛說文云箛蠶薄也又作菑揚子方言云薄宋魏陳楚江淮之間謂之菑萑葦水草也詳萑葭

猗彼女桑

毛傳云女桑莢桑也鄭箋云條桑枝落之采其葉也女桑少枝長條不枝落者束而采之爾雅釋木云女桑楸桑郭注云今呼桑樹小而條長者爲女桑樹此言女桑爲桑樹之小者桑小生條故條長又名楸桑楸亦作莢非桑莢也桑莢爲前章之柔桑不宜又重言之上言條桑是爲大樹蓋桑條不伐則來年枝葉不茂此爲古制今尙行之若樹本小則不堪斬伐葉已采矣條須聽其滋長故云猗蘇氏曰猗

長也葉盡則條猗猗而長也爾雅棲桑棲祗訓小故郭氏又引當時俗語爲注蓋伐桑條之候桑葉已盛此時已無萸桑可取也傳以棲爲萸莫誤讀

七月鳴鵲

毛傳云鵲伯勞也與爾雅釋鳥文同鵲一作鵲或名鵲鵲伯勞或作百勞或作博勞或名百鵲或名伯趙郭氏云鵲似鵲鵲而大左傳曰伯趙氏春秋昭公十七年傳云伯趙氏司至者也樊光曰伯趙司至以夏至來冬至去爲其來去以夏至冬至故曰司至夫夏至陰生鵲應陰鳴禮月令仲夏之月鵲始鳴夏小正五月鵲則鳴易通卦驗云小暑伯勞鳴淮南子時訓注云五月陰極於下博勞應陰而鳴夏至爲五月中小暑爲六月初諸說微有不同然言鵲之鳴大略在五六月之間今忽言七月與諸說似戾鄭箋於是曲解曰伯勞鳴將寒之候也五月則鳴幽地晚寒鳥物之候從其氣焉嘗考幽地在今陝西

居近西陲寒來宜早易說卦傳言乾爲寒爲冰位西北故云寒冰禮云天地嚴凝之氣始於西南而盛於西北皆是西陲早寒之證也王肅又曲解之曰古文五字與今文七字相近故又訛爲七因一字之難明而欲改經以暢己說則其失尤甚於鄭嚴氏詩緝引陳思王惡鳥論云伯勞以五月鳴應陰氣之動陰爲殘賊蓋賊害之鳥也其聲鷦鷯故以其音名云補傳曰鷦仲夏始鳴至七月則鳴之極而將去矣毛西河續詩傳云七月鳴鷦以起下八月載續言鷦應陰而鳴五月一陰生至七月三陰生矣陰氣漸盛鷦鳴愈甚養蠶者宜續絲製衣以禦寒氣離騷云恐鷦鷯先鳴兮使百草爲之不芳也亦言草木零落之幾兆於鳴鷦也春秋傳言伯趙氏爲司至是鷦之至在五月

中因初至而聞其鳴故曰始鳴鷦之去在十一月中由五月至十一月皆有鷦鳴非七月後鳴極將去也鷦之去不在七八月間也但此鳥關左未見識者絕少張茂先禽經云伯勞飛不能翔直刺而已形

似鸛鵒鵒喙黃伯勞喙黑此言鵒之形焦延壽易林云鵒則單栖
驚必匹飛此言鵒之性陸農師埤雅云鵒能制蛇鵒鳴在上蛇盤不
動楊用修丹鉛錄云鵒能搏擊鷹集於林則盤旋鳴聒俟飛輒擊之
俗呼謂鳳凰皂隸蜀名鴛鴦滇中名鐵鸚哥又名榨油郎鵒之俗名
亦可知也

四月秀蓼

毛傳云不榮而實曰秀蓼草也鄭箋云夏小正四月王荳秀蓼其是
乎物成自秀蓼始說文云蓼草也詩曰四月秀蓼劉向說此味苦苦
蓼也段氏注云夏小正四月秀幽幽蓼一語之轉必是一物似鄭不
當援王荳也劉向謂苦蓼今則不識味苦應夏令也詩緝引曹氏說
云蓼遠志也爾雅釋草云蓼繞棘菟注云今遠志其上謂之小草本
草言遠志一名蘇莞一名繞蓼一名細草四月采根陰乾參訂諸說
知蓼爲遠志矣四月陽氣極於上而微陰已胎於下蓼感之而早秀

毛不指蔓爲何草鄭疑爲王萐陸璣亦無明說曹氏以爲遠志證據
甚明劉向以爲苦蔓今遠志苦澀醫家以甘草熟煮之乃可用也本
草言遠志生泰山背宛句山谷今河陝京西州郡亦有之根黃色形
如蒿三月開花白色根長及一尺泗州出者花紅根葉俱大於他處
夫郭注爾雅言遠志葉如麻黃赤華本草言遠志葉如蒿白華土性
不同種類亦異其根入藥稱上品能治健忘益聰明故名遠志而苗
極細微故名小草鄭箋引夏小正以蔓爲王萐蓋王萐乃月令之王
瓜今俗名赤苞與蔓迥異孔疏云蔓之爲草書傳無文鄭以四月生
者自是王瓜夏小正作王萐而生秀自異本草言萐有實七月采陰
乾云七月采之又非四月已秀是蔓與否未能審之夫孔氏雖不識
蔓爲何草而疑鄭氏以王萐爲蔓之非蓋以王萐秀於七月開淡黃
花結小瓜生青熟紅內有黑子是生於四月非秀於四月也段氏注
說文據劉向說以爲苦蔓邵注爾雅亦據劉說言蔓非遠志段氏以

萋爲夏正之幽遠志爲細草藏於衆草之中不易尋采頗有幽意而幽字從幺與細小之義亦近遠志味苦與苦萋之名亦合萋幽與繞萋皆爲轉音是萋爲遠志明矣毛西河以萋爲苦菜苦菜卽今俗之鴨兒食草雖秀於四月而無萋名苦菜名茶六章云采茶此何不言秀茶也總由不詳此草誤據夏小正禮月令王瓜生苦菜秀二語而作此解徐氏又以萋爲狗尾草失之愈遠矣

五月鳴蜩

毛傳云蜩螗也爾雅所載之蜩凡七種一曰蜎蜩二曰螗蜩三曰蜚蜩四曰蠶茅蜩五曰蜩馬蜩六曰蜩寒蜩七曰蜩蟪蜩郭注蜩蜩云夏小正傳曰蜎蜩者五彩具注螗蜩云夏小正傳曰螗蜩者蜩俗呼爲胡蟬江南謂之螗蜩注蜚蜩云如蟬而小方言云有文者謂之蜩夏小正曰鳴蜩虎懸注蠶茅蜩云江東呼爲茅截似蟬而小青色注蜩馬蜩云蜩中最大爲馬蟬注蜩寒蜩云寒蜩也似蟬而小

青色月令曰寒蟬鳴注蜺蜺蟬云卽蜺蜺也一名蜺蜺齊人呼蜺
蜺李氏本草以五月鳴者爲馬蜺一名蚱蜢一名齊女較諸蟬獨大
而色黑夏正言五月鳴者爲良蜺唐蜺今之蜺鳴於五月者其形頗
小其聲直而長其鳴於立秋候者其形巨黑兼綠色其聲曲而遠及
過別枝猶曳餘音此謂之蟬是爾雅之寒蜺也俗呼曰秋涼又曰接
涼言此蟲鳴則氣涼也又有形尤小色青長翼而聲近鳴咽者俗名
吉了乃接涼字音之轉關左有蟬無蜺關之右至盧龍蜺鳴漸多形
色黑而小於蟬槐柳陰中聚衆雜鳴音如鼎沸大雅言如蜺如蜺如
沸如羹詩人善取喻也王氏論衡云蜺蜺化腹蜺腹蜺蜺背出而爲
蟬或云蜺蜺所轉之丸久而化爲此蟲或云蟬卽蜺蜺所化由不潔
轉爲至潔也古者蜺入食品見禮內則今未聞有食者矣

取彼狐狸爲公子裘

狐狸皆山獸名爾雅釋獸云狸子隸說文云狸伏獸似狸關左俗渾

呼曰狐狸究之狐自爲狐狸自爲狸二物判然不相似也蓋狐形似
狗狸形似貓狐毛一色狸多斑文禮檀弓云狸首之斑然此狸有斑
文之證也宋史安陸州貢野貓野貓之名至今俗猶呼之其形與家
貓略同或黑毛或犂文比家貓身軀較偉面腰俱長大者長二尺餘
毛厚而細圓目炯炯足最捷恆入村竊雞食正字通云狸野貓也有
數種大小似狐毛雜黃黑有斑如貓圓頭大尾者爲貓狸善竊雞鴨
斑如羆虎方口銳頭者爲虎狸食蟲鼠果實似虎狸尾黑白錢文相
間爲九節狸頰文如豹而作麝香氣者爲香狸卽靈貓也南方有白
面尾似狐者爲牛尾狸亦名白面狸又登州有狸頭魚尾者名海狸
是狸之類不一而總名野狸家貓亦名狸有狸奴名所以別之曰野
也狸有食鼠者觀其捕鼠趨縮之步不失尺寸後鄭注周禮狸步云
狸善搏者也行則止而凝度焉其發必獲廣雅云玉面狸人捕畜之
鼠皆帖伏不敢出夫野狸之可畜以捕鼠者今則未見其恆見者爲

蟋蟀螽三物三釋是非一物也其證一郭注爾雅云螽螞蟴也俗呼蟋蟀螽小蟲黑身赤頭一名莎雞又一曰樛雞蟋蟀今促織也一名青蛩邢疏云螽螞蟴周南作螽斯七月作斯螽雖字異文倒其實一也螽一名天雞一名莎雞一曰樛雞李巡曰一名酸雞詩豳風六月莎雞振羽蟋蟀一名螽詩唐風蟋蟀在堂歲聿其莫爾雅分斯螽莎雞蟋蟀爲三蟲郭氏邢氏亦以三蟲解之不爲一物也其證二毛傳云斯螽螞蟴也莎雞羽成而振迅之鄭箋云自七月在野至十月入我牀下皆謂蟋蟀也言此三物之如此者將寒有漸非卒來也傳引爾雅以解斯螽而莎雞惟言振羽則已分斯螽莎雞爲二物矣箋未明言斯螽莎雞蟋蟀爲何蟲而指之曰三物其不名爲一類可概見矣其證三陸璣疏云斯螽揚雄曰春黍也幽州人謂之春箕長角長股青色黑斑其股似玳瑁文五月中以兩股相搓作聲聲聞數十步莎雞似蝗而斑色毛翅數重翅正赤或謂之天雞六月中飛爾振羽

索索作聲幽州謂之蒲錯夫幽州卽今關之左右未聞呼斯螽爲春箕呼莎雞爲蒲錯者然其名不同則其物亦異而言二蟲之形色亦較詳是不與蟋蟀爲一物也其證四嚴氏詩緝云斯螽蟋蟀也蚱蜢也舊說以爲卽螽斯非也莎雞絡緯也促織之類也此以斯螽非螽斯斯螽爲馬蟥螽斯爲飛蝗本非一物其以莎雞爲促織類蓋言似促織也其辨斯螽甚是而其言莎雞則混入蟋蟀然亦不爲一物也其證五山陰陸氏云斯螽江東謂蚱蜢善害田穉古今注曰莎雞一名絡緯謂其聲如紡緯也促織一名投機謂其聲如急織也夫蟥類食苗本有此蟲而斯螽多居水草間不食禾莎雞雖鳴不似紡緯是言斯螽莎雞皆誤而言莎雞非促織略同嚴氏亦以斯螽非莎雞莎雞非蟋蟀也其證六虞氏天香樓偶得言斯螽莎雞蟋蟀爲三蟲亦引爾雅郭注及陸疏爲據其云斯螽一生九十九子周南螽斯羽卽此斯本語助故或云斯螽或云螽斯其云莎雞一名絡緯謂其鳴如

紡緯其云蟋蟀似蝗而小善跳正黑有光澤如漆一名蜚一名促織
一名吟蛩秋初生得寒乃鳴此言三蟲形色不必盡是其言斯螽卽
螽斯與邢氏同與嚴氏異其言莎雞爲絡緯與郭陸俱異與山陰陸
說同其言蟋蟀則似野蟋蟀而其分之爲三則亦略同諸家也其證
七蟬蛸也蟋蟀也春箕也蚱蜢也是斯螽有四名天雞也樛雞也酸
雞也蒲錯也是莎雞有四名蜚也促織也投機也吟蛩也是蟋蟀有
四名各有其名各不相混禮月令季夏之月蟋蟀居壁是六月卽名
蟋蟀不以六月名莎雞也王褒賢臣頌云蟋蟀俟秋吟五月六月非
秋不能動股振羽而鳴也蟋蟀之鳴以翼不以股此言動股則斯螽
非蟋蟀也莎雞鳴以翼則飛行而鳴於野不鳴於家此言入在牀下
則莎雞非蟋蟀也是爲三物非一物其證八此三蟲關左皆有斯螽
俗呼曰草螞蟥莎雞俗呼曰撒達蟲蟋蟀俗呼曰家趨織斯螽形似
蝗而小色青黃翅有花文長股善躍股動摩翼作聲非兩股相搓而

鳴頭微方無角有角者其聲在翼不在股陸疏言斯螽長角誤莎雞形似草蟲土灰色外翅蒼黑色內翅淺紅色艷如桃花內外翼祇二層亦無毛黃昏之候繞原低飛振羽之聲蓋沙沙然小兒拍手作響便止於地郭氏言莎雞赤頭陸氏言羽毛數層誤斯螽似蝗而實非蝗蝗爲害稼之蟲沴氣所生不習見螽則常有者羣蝗食禾螽惟食草蝗飛有聲不惟股不鳴其集於地翼亦不鳴也莎雞形似斯螽而色灰蒼飛行有聲止則不鳴恆在野不入室音則沙沙不類紡緯蟋蟀之在室者體色蒼有白花文春夏卽育不必至秋始生偶逢秋涼四壁唧唧終夜不息嚴氏山陰陸氏謂莎雞爲絡緯虞氏謂蟋蟀至秋始生黑色如漆皆誤陸農師埤雅言莎雞鳴以時故有雞之號義尤近附會也

穹窒熏鼠

鼠小獸之穿屋墉者見行露

六月食鬱及萸

毛傳云鬱棣屬萸萸萸也說文云鬱木叢生者萸萸萸陸疏云鬱樹高五六尺其實大如李色赤食之甘廣雅云山李雀李鬱也萸萸舌也本草言萸名萸萸今俗呼曰山葡萄蔓葉皆與家葡萄同蔓微細弱葉碎而不整實小而圓如黃柏子色黑味酸不甚甘美處處恆有鄉人采食之夫常棣之實名鬱李亦作郁李俗呼漚李郁音似鬱漚亦鬱音之轉小木叢生花葉與李無異惟實小味酸而漚樹高二三尺關左未見高至五六尺者傳以鬱爲棣屬是以常棣爲鬱別名孔疏乃云爲唐棣之屬唐棣大木又名移本非果類何以云食因毛注而誤增一字便解不去古人之書不可輕加筆削類如此也晉宮閣名謂車下李三百四十株萸李一株車下李卽鬱萸李卽萸二者相類而同時熟夫以萸爲李此最可異萸字從草不從木毛傳廣雅皆不言其似李葡萄蔓生籐蘿之屬萸在說文列於草部籐本蔓生有

似於草則萁非木類也齊民要術引陸璣疏曰櫻萁實大如龍眼黑色今之車鞅籐實是蓋陸疏原本舊有此文今本脫去其言萁實大不至此而言萁爲籐非木類不待辨也或據說文以萁爲山韭然說文引韓詩作食鬱及藿非言萁卽藿也藿爲山韭萁爲藿萁字本不同不得誤合爲一也詩緝云鬱雀李棣唐之屬萁萁萁也鬱類而小別也旣以萁爲嬰又以萁似鬱草木混同蓋無確見矣

七月烹葵及菽

爾雅釋草云蒔葵葵露郭注云蒔露也說文云葵菜也未豆也羅未之少也未卽菽字崔寔云六月六日可種葵中伏後可種冬葵九月可作葵菹山陰陸氏云齊民要術言今有紫葵白葵二種左傳鮑莊子之足不如葵葵猶能衛其足今葵心隨日光所傳輒低覆其根李氏本草云葵三月種之嫩苗可食五月蔓延其葉似杏葉而肥厚八月九月開紫黃花纍纍結實大如五味子熟則紫黑色揉取汁紅如胭脂

脂女子飾面點脣及染布故謂之胡胭脂亦曰點絳子羣芳譜云葵陽草也一名蜀葵一名露葵一名戎葵一名一丈紅處處有之本豐而耐旱味甘而無毒可備蔬茹可防荒儉種類甚多宿根自生天有十日葵與終始故葵從癸能自衛其足又名衛足花如木槿有紅紫白黑數色昔人謂疎莖密葉翠萼艷花金粉檀心可謂善狀此花已王氏農書云葵陽草爲百菜之主備四時之饌夫本草所言之葵爲蔓草關左未見王氏所言之葵卽今之大蜀菊徧地可種亦最易蕃療疾者恆用之秋生嫩葉嘗見燕趙人烹食潘安仁閒居賦云綠葵含露古蓋以葵爲常蔬也菽豆之總名葵曰烹則葵爲菜葵菽連言菽在烹內是菽亦爲蔬雖豉羹未見於古書然豌豆爲戎菽載於爾雅藿爲豆葉古人與藜同餐儀禮公食大夫禮有牛藿豌豆莖葉烹調得宜味亦鮮美安見此菽非卽今之豌豆類也晉地農人多食豆葉秦晉連疆風俗宜同亦足徵民風之節儉矣葵菽與上鬱蓂爲對文

鬱莫二果名葵菽二菜名配合勻稱義理宜然而諸儒俱不加注何也

八月剝棗

棗果名樹似棘而爲大木堅韌理細其色外黃中赤小枝多刺生葉遲於他樹似榆葉而光滑一枝五七葉開小白花結實大如指生青熟紅纍纍盈枝甘美可食爾雅釋木所載有棗壺棗邊要棗棗白棗枳酸棗楊徹齊棗遼羊棗洗大棗煮填棗蹶泄苦棗暫無實棗還味枳棗凡十一種而棗爲總名棗爲處處皆有之果味甘色赤白者今未見亦鮮有苦者酸棗爲棘羊棗俗名軟棗有棗名而不似棗大棗名洗郭注言出河東郡猗氏縣大如雞卵河東今之山西猗氏縣隸蒲州府棗大者長近二寸謂大如雞卵亦近似之羣芳譜云棗一名木蜜王氏農書云棗南北皆有然南棗堅燥不如北棗肥美生於青齊晉絳者尤佳齊民要術云旱澇之地不任稼穡者種棗則任矣清

益錄云百益一損者棗故醫氏目爲百益紅說文云束木芒也埤雅云大曰棗小曰棘棗性高故重束棘性低故並束棗棘皆有束故字皆從束禮曲禮云婦人之贊根榛脯脩棗栗儀禮士昏禮云婦摯舅用棗栗左傳云女贊不過榛栗棗脩皆以棗爲實也王氏言棗之佳者生於晉絳而今燕郡亦多出棗商賈販之爲貨果之上品也

十月穫稻

稻嘉穀秬也見鵠羽

七月食瓜

說文云瓜瓠也象形蓋言瓜字篆文象瓜實在鬚蔓間之形李氏本草云瓜類不同其用有二供果者爲果瓜甜瓜西瓜是也供菜者爲菜瓜胡瓜越瓜是也在木曰果在地曰瓠大曰瓜小曰瓠其子曰瓢其肉曰瓢其跗曰環謂脫花處也其蒂曰薹謂繫蔓處也禮記天子削瓜及瓜祭皆指果瓜也夫果瓜亦有三一曰甜瓜又名甘瓜俗名

香瓜一曰西瓜又名寒瓜有與西瓜同類而瓢不甚甘曰打瓜肉不堪食其子爲果中佳品市貨瓜仁皆打瓜子也神農本草經所載瓜蒂乃甜瓜之蒂西瓜源出西域入中夏較晚元人吳瑞云契丹破回紇得此種本草言胡嶠征回紇得此種歸是西瓜自五代時始入中國雖陶氏本草瓜蒂注有寒瓜甚大之語彼時中國西瓜尙未徧有則陶氏以前未有西瓜可知此詩所言之瓜爲甜瓜非西瓜也蓋甜瓜三月下種葉圓似瓠而小蔓延依地五月開小黃花結實大小不勻生苦蒂黏於蔓熟甘香則蒂自落有圓有長有首長末銳脫花處蒂鼻或凹稜四五稜者形旣不一有色青色白色黃色黑或黑白青黃相間色亦不一五六月際可食西瓜之熟較甜瓜略晚夏小正言五月乃瓜較今甜瓜之熟又微早何至七月始食之如以朔風爲周正夏之七月卽周之五月不惟七月流火見於本章如四月維夏六月徂暑他章亦然則此七月非五月明矣詳釋詩義上六句似養老者

下六句似養壯者上六句以六月發端下六句以七月發端可見也然則所食之瓜或是菜瓜廣雅所言龍蹄獸掌羊駁兔頭桂髓蜜甯小青大斑八名皆是果瓜今俗所見瓜之爲蔬者有黃瓜絲瓜苦瓜冬瓜倭瓜五種可食之時亦多在七月此人人習讀而不曾致疑者月令孟夏之月王瓜生乃今之赤苞入藥用非蔬類

八月斷壺

毛傳云壺瓠也孔疏云以瓠與食瓜連文則是可食之物故知壺爲瓠謂甘瓠可食就蔓斷取而食之夫古者瓠匏通稱八月瓠成質堅蓋斷之爲器非食之

九月叔苣

毛傳云苣麻子也孔疏云苣麻之有實者蓋麻分雌雄有子爲雌麻名苣不結子者爲雄麻名臬言苣是叔麻子也

采荼薪樗

毛傳云檇惡木也陸疏云檇樹及皮皆似漆青色葉臭蓋茶爲苦菜
檇爲臭椿茶非甘滑之蔬檇爲不材之木故農夫於茶則采之於檇
則薪之

黍稷重穋禾麻菽麥

毛傳云後熟曰重先熟曰穋蓋禾之熟有早晚故先後之名分也黍
稷菽麥皆穀名

晝爾于茅

茅野草荻屬見野有死麕

獻羔祭韭

說文云韭菜也一種而久生者也故謂之韭象形在一之上—地也
夏小正云正月囿有見韭禮曲禮云韭曰豐本王制云庶人春薦韭
內則云豚春用韭儀禮聘禮云韭菹是韭爲祭祀之豆實又爲日用
之常蔬也埤雅云韭之美在黃今俗於冬月用草糞培韭根令深厚

溫暖韭生黃芽貨以爲珍俗名韭黃漢書龔遂傳遂治渤海勸民種一畦韭南史周彥倫傳文惠太子問彥倫曰菜食何味最勝對曰春初早韭秋末晚菘是嫩韭爲嘉蔬老則辛葷不堪食也韭有園韭山韭之別園韭可種葉似薤而肥大高盈尺六月出莖開小白花尖瓣六出攢簇成叢結子色黑暗似葱子山韭莖葉與園韭略同花作淡紫色爾雅釋草言霍山韭卽此也羣芳譜又有水韭生水五六月堪食不葷而脆關左未見此種也

鴟鴞鴟鴞既取我子無毀我室

毛傳云鴟鴞鵂鳩也鄭箋云重言鴟鴞者將述其意之所欲言也爾雅釋鳥云鴟鴞鵂鳩郭注云鴟類言鴟類者以鴟鴞與怪鴟梟鴟皆有鴟名也鴟鴞又名茅鴟郭注爾雅云今鵂鴞也爾雅又有萑老鵂郭注云木兔也似鴟鵂而小兔頭有毛角夜飛好食雞說文云雀鴟屬從隹從艸有毛角所鳴其民有禍又云鴟鴞鵂鳩也段氏注云鴟

鴟則爲鵂鵒鴟舊則爲舊留不得舉一鴟字謂爲同物又不得因鴟與梟音相近謂爲一物又不得因鴟鴞與鴟鵂音近謂爲一物也鴟舊不可單言鴟鴟鴞不可單言鴞凡物以兩字爲名者不可因一字與他物同謂爲一物鴟鴞形似鷹鷂立高二尺餘羽黃蒼斑文頭如兔毛角雙峙圓目利爪晝伏夜出破他鳥巢食其子及卵或入村鄉攫雞貓食之其鳴如撮口相呼嗚嗚不歇又如人鼾睡聲關左俗名曰橫呼是言其多聲又名曰狼扈是言其性慙夜集人家屋上鳴主凶喪說文謂所鳴主禍蓋以此也其或夜蹲山嶠長呼不息主天將雨亦有驗莊子秋水篇云鴟鵂夜撮蚤察毫末晝出而不見邱山陳藏器本草云鴟鵂夜能入人家拾人手爪知人吉凶故除爪者埋之戶內恐爲鴟鵂所得夫鴟鵂非鴟鴞鴟鵂爾雅名怪鴟又名鴟鵂郭云江東呼鴟鵂亦謂之鴟鵂其聲亦似休留字說文名鴟舊晝伏夜飛往來於深山密林未見其至村里也莊子言撮蚤爲吃蚤小蟲亦

非爪甲之爪也陸璣謂鷦鷯似黃雀而小其喙尖如錐取茅秀爲巢以麻紩之如刺繡然懸於樹枝謂之鷽雀或曰巧女此蓋以鷽鷽當鷽鷽也鷽鷽一名桃蟲乃鳥之極小者豈能毀他鳥之巢以取其子哉此由揚氏方言桃蟲與鷽鷽之別名雜亂同釋陸氏不察取之作注而與詩義乖舛不合陸農師嚴華谷非之宜矣邵晉涵爾雅正義云鷽鷽鷽鷽鳥名也鷽鷽之所以愛養其子者適所以病其子愛養其子者謂堅固其窩巢病之者不知託於大樹茂枝反敷之葦蒲風至蘭折巢覆有子則死有卵則破是其病也夫詩言取他鳥之子破他鳥之巢此則云自病其子自壞其巢調停陸說而並詩義亦失之未嘗目覩其物徒據舊文懸想猜測冀千慮之一得蹈此病者比比皆是也鷽鷽有鷽鷽名揚氏言鷽鷽一名鷽鷽因有以鷽鷽爲桃蟲者鷽鷽字與鷽鷽爲轉音說文言其禍民物近於怪因有一鷽鷽爲怪鷽者土梟名訓狐名鷽鷽鷽名橫呼與狐鷽音似因有以鷽鷽爲

巢鳥者凡鳥夜多目瞶鴝鴂之目夜察秋毫故能破他鳥之巢以取其子鴝鴂入村夜攫貓雞蓋常見之

徹彼桑土

毛傳云桑土桑根也此爲桑根之皮也桑根在土中其皮外黃內白剝而取之柔軟堅韌可代麻蒯

予所捋茶

毛傳云茶萑茗夫茗亦作芳爾雅釋草云葦醜芳是芳爲葦之華茶乃萑之華也孔疏云茶蘗之秀穗也顏師古漢書注名葦蘗蓋葦蘗皆萑之別名萑初萌芽似錐萑秀成穗爲茶捋萑穗以藉巢亦鳥之所恆有者

蛸蛸者蛸烝在桑野

毛傳云蛸蛸蛸貌蛸桑蟲也鄭箋云蛸蛸蛸然特行久處桑野有似勞苦者夫食葉之蟲凡樹皆有樹葉面滑而背澀食葉之蟲常居葉

下詩殆以蠋居葉下與人在車下也勞苦似非詩義也說文蠋作蜀釋之云葵中蠶毛傳解蠋爲蟲許氏解爲蠶蓋以蠋形似蠶曰葵中者言蜀葵中亦有不獨桑間始有蠋也爾雅釋蟲云蜋烏蠋郭注云大蟲如指似蠶韓子云蠋似蛇蠶似蠋人見蛇則驚駭見蠋則毛起然而婦人拾蠶漁者握蠶刈之所在則忘其所惡皆爲孟賁淮南子亦云蠋之與蛇蠶之與蠋狀相類而愛憎異參考諸說是蠋爲似蠶之蟲見蠶卽可以識蠋也今關之左俗尙植桑而食桑葉之蟲較少其有一種青蟲似蠶而細小者卽小宛所謂螟蛉也又一種青黃灰色似蠶之蟲足生兩端行則一屈一伸此易傳所謂尺蠖也間有毛載形不似蠶又有一種比蠶差小蒼灰色吐絲成繭此卽野蠶惟食桑葉不食葵蘘亦非蠋也莊子庚桑楚云奔蜂不能化蘘蠋蘘蠋卽豆上青蟲大如拇指與蠶酷似俗呼曰豆蟲彼葡萄蘘香鳳仙芝麻黃藥棠梨葉間皆有似蠶之蟲青黃色有花文或黑黃色前後共十

六足半據莖葉上風搖不限亦有色黑者此爾雅所謂烏蠋也山左人呼曰脹牛蠋此詩言在桑野乃是食桑葉者豈西陲有食桑之蠋東方桑樹獨無此蠋乎

果羸之實亦施于字

毛傳云果羸枯樓也爾雅釋草云果羸之實枯樓郭注云今齊人呼之爲天瓜李氏本草云果羸羸與羸同許慎云木上曰果地下曰羸此物蔓生附木故得兼名夫枯樓卽果羸二字轉音亦作藟藟又作苦藟又作瓜藟瓜音與姑相近故又有澤姑之名古字頗少古人名物往往借用借果羸爲瓜藟與八月斷壺言采其壺借壺爲瓠借壺爲蔞相似如曰蔓生附木此詩曰施字又當如何作解考察名物不能於物之形象性情作解而惟於字義中求之大半穿鑿附會不足信也羣芳譜云枯樓三月生苗引蔓葉如甜瓜而狹作又有細毛七月開花似瓠瓢花淺黃色結實花下如拳生青九月熟黃赤色有圓

者有銳而長者內有扁子大如絲瓜子殼色褐子色綠根一名白藥直下生年久者長數尺秋後掘者有粉夏月掘者有筋無粉果與根皆入藥材此草關左恆有種之以爲藩籬作點綴者蔓細而長葉如苦瓜而厚花似王瓜而大果如甜瓜而小生色青綠八月熟深黃色取根擣之淘洗出粉名瓜婁粉取子剖瓢名瓜婁仁

伊威在室

毛傳云伊威委委也此蟲處處皆有古名委委一名鼠負一名鼠姑伊一作蚺負一作婦爾雅釋蟲云蚺威委委又云蟠鼠負郭注云瓮器底蟲陸疏云伊威一名委委一名鼠婦在壁根下甕底土中似白魚者是也夫此蟲名鼠負韓氏本草言其生土坎中常惹著鼠背猶臬耳名羊負來也又名鼠婦陸氏埤雅言食此蟲令人善淫又名鼠姑婦同類也夫古人因物命名在當時未必無意然五方之語音不同則物名遂遷轉而漸失如燕鵲以形名鵲鴨以聲名鸛鴈以色名

至今猶可會意得之若伊威委黍鼠負婦姑以古音讀之音皆相似姑婦似黍鼠音伊威似鼠黍轉音焉必其爲蟲著鼠背食之善淫邪果爾此蟲有何威其形又不似黍也伊威由溼氣所生故俗名溼生蟲遼陽北呼曰潮蟲猶是溼生之意故鄭箋云家無人居則生也關左又呼曰稊米蟲此蟲形扁而勻長灰白色背有橫文黑目雙鬚十四足小者與稻粒酷似凡屋壁溼處恆有之陸氏謂伊威似白魚此爲食字之蟬生故紙堆中及書卷內形似小魚故名白魚又名蠹魚又名脉望漢以前無紙白魚何自生也

蠨蛸在戶

毛傳云蠨蛸長踦也爾雅釋蟲文同郭注云小蠃蠃長腳者俗呼爲喜子陸疏云蠨蛸長踦荊州河內人謂之喜母此來著人衣當有親客至有喜也說文云蠨蛸長股者或曰長踦或曰長腳或曰長股諸家說雖小異而大意略同蓋蠨蛸爲蜘蛛之別種爾雅所載次蠃蠃

鼃鼃鼃螯土鼃鼃草鼃鼃方言云鼃鼃鼃螯也自關而西秦晉之間謂之鼃螯自關而東趙魏之郊謂之鼃鼃或謂之蠃螈北燕朝鮮冽水之間謂之蠃螈是皆在野之蜘蛛而非蠃螈也蠃螈亦名蜘蛛而獨在室在室之蜘蛛亦非一類此爲長足頭腹俱小足有六細如綫而長數倍於身室有人居則蠃螈多網壁角室無人居則蠃螈常網戶樞但其網絲縷雜亂不及檐外蜘蛛結撰工巧也唐人玉臺體詩言蠃子之飛爲藻砧歸家之占此卽喜母著衣有親客至之意劉勰新論亦言野人晝見蠃子爲喜樂之瑞故俗呼蠃螈曰喜蛛

町疃鹿場

鹿山獸名見野有死麕

熠燿宵行

毛傳云熠燿燐也燐螢火也孔疏云燐鬼火之名以螢火爲燐非也陸氏埤雅崔氏古今注皆云熠燿螢爾雅釋蟲云螢火卽炤郭注云

夜飛腹下有火禮月令季夏之月腐草爲螢夏小正云八月丹鳥羞白鳥丹鳥螢白鳥蚊蚋也本草所載螢類有三其有翼能飛者乃茅根所化月令言腐草所爲者也其居傍水際者名水螢唐李卿水螢賦所謂彼何謂而化草此何謂而居泉是也其形似蛆蟲長尾有光無翼不能飛一名蠋竹根所化集傳謂宵行如蠶者指此關左多草少竹多山少澤故惟有飛螢形如叩頭蟲大亦如之黃白色雙翼長與身等腹近尾下有光飛如星流有人兩手拍擊作聲便止於地向居北燕夏月常見飛螢而大僅如蠅多生牆陰階下城內人家屋宇密比豈有腐茅因思螢爲溼氣所化未必盡屬於草也晉書車允傳云允家貧不常得油夏日則練囊盛數十螢火以照書夫螢火之光本自無多有人提取其光自閉照字讀書似不足信古今注云一名耀夜一名景天一名熠耀一名丹良一名丹鳥一名宵燭一名燐是螢有燐名傳以熠耀爲燐本自非誤孔疏不必駁也

鵲鳴于垤

毛傳云垤螻蛄冢也將陰雨則穴處先知之矣鵲好水長鳴而喜也鄭箋云鵲水鳥也將陰雨則鳴說文云鵲雀也詩曰鵲鳴于垤禽經云鵲仰鳴則晴俯鳴則陰鵲生三子一爲鵲巽極成震陰變爲陽震爲鵲巽爲鵲陸疏云鵲鵲雀也似鴻而大長頸赤喙白身黑尾翅樹上作巢大如車輪卵如三升杯望見人按其子令伏徑舍去一名負釜一名黑尻一名背竈一名皂裙又泥其巢一傍爲池含水滿之取魚置池稍稍以食其雛若殺其雛則一村致旱災也陶氏本草注云鵲有二種似鵲而巢樹者爲白鵲黑色曲頸者爲烏鵲漢書楊震傳云有冠雀銜三鱣飛集講堂前注云冠雀卽鵲是鵲爲食魚之水鳥也寇宗奭云鵲似鵲而頂不丹項無烏帶兼不善唳止以喙相擊而鳴李氏本草云鵲色灰白翅尾俱黑多巢於高木其飛也奮於層霄旋繞如陣仰天號鳴必主有雨或謂能致旱災此不經之說至謂泥池

養魚有人升木驗其巢蓋不然此鳥關左亦嘗見之當春日和煦之
候有大鳥翔於雲端其大如鶴人指爲鶴背尾色黑故有負釜皂裙
諸名但祇往來飛鳴而無作巢久居者若空中泥池風高土燥焉能
貯水養魚以意揆之其誣可知說文云垤螳封也韓氏云巢居知風
穴居知雨天將雨蟻出壅土鶴見之長鳴夫蟻爲小蟲處處有之蟻
又作螳爾雅釋蟲云蚍蜉大螳小者螳蜋打螳蜋飛螳方言云蚍蜉
齊魯之間謂之蚍蜉西南梁益之間謂之元蚍燕謂之蛾蚋其場謂
之坻或謂之垤其大而赤色斑駁者名螳有翅而飛名蜋今俗則總
呼曰馬蟻天晴則啓穴以便出入天將雨則銜土封穴高寸餘如小
塚然故名蟻塚又名蟻壙言垤形如壙也孔疏謂將欲陰雨水泉將
潤故蟻避溼而上塚嘗見蟻穴多近高地將雨之候蟻又高遷千百
成羣往來如織俗名曰蟻行香不盡上塚避水也或誤會毛傳蟻塚
之說也天晴蟻或伏穴不出陰則蟻羣出銜土塞穴鶴食蟻見蟻出

而長鳴是雨散也此詩以鶴鳴興下婦歎以于垓興下于室興下章倉庚于飛興下之子于歸以熠燿其羽興下皇駁其馬同例非賦體也

有敦瓜苦烝在栗薪

毛傳云敦猶專專也烝衆也言我心苦事又苦也鄭箋云此又言婦人思其君子之居處專專如瓜之繫綴也瓜之瓣有苦者以喻其心苦也栗析也言君子又久見使析薪於事尤苦也此皆言舉瓜之苦者以喻人之苦古無他瓜詩中言瓜則爲甜瓜甜瓜生則味苦熟則香甘試以全詩衡之桑有蠋蠃有實周公東歸正在夏月瓜未盡熟自是目前景物而首章言始歸在路二章言在路思及家室之荒涼三章言我征事至是此時之歸士已至家矣不宜失序又言析薪之苦也蓋從軍三年忽歸故鄉瓜延栗薪猶足動懷則是舉小見大舉輕見重之筆未必中有喻意鄭氏訓烝爲久訓栗爲析愈迂曲而失

之愈遠也

倉庚于飛熠燿其羽

鄭箋云倉庚仲春而鳴嫁取之候也熠燿其羽羽鮮明也蓋倉庚卽黃鸝熠燿其羽者言其羽鮮明如螢火之光嘗於雨後偶見流鶯映日低飛金黃羽毛其光射目誠有似乎螢火也者小雅言交交桑扈有鶯其羽以鶯比桑扈之文與以螢比倉庚之羽正同夫軍士之歸計在夏月而從征年久婚已愆期備禮卽行不拘霜降冰泮亦情之所宜有者倉庚出以二月蟄於九月羽飛熠燿豈定仲春螢火行宵瓜實施宇迴非春日景物可知古人讀書不必心細也

之子于歸皇駁其馬

毛傳云黃白曰皇駁白曰駁爾雅釋畜文同

九戩之魚鰾魴

毛傳云鰾魴大魚也爾雅釋魚云鰾鰾郭注云似鰾子赤眼說文云

鰓赤目魚陸疏云鰓似鯢魚而鱗細於鯢赤眼多細文此魚關左俗呼曰赤眼魚或呼曰鰓子魚圓身細鱗色白而微蒼眼中血絲橫貫注家以爲赤眼誠然也大者長二三尺餘松花諸江皆有之漁人言此魚善於遯網頗不易取羅願云鰓魚目中赤色一道貫瞳魚之美者今俗謂之赤眼鰓食螺蚌

鴻飛遵渚

毛傳云鴻不宜循渚也鄭箋云鴻大鳥也不宜與鳬鷺之屬飛而循渚陸疏云鴻羽毛光澤純白似鶴而大長頸肉美如雁又有小鴻如鳬色白今人直謂之鴻蓋鴻爲鵠鵠類名黃鵠亦名黃鶴

狼跋其胡載蹇其尾

毛傳云跋蹇蹇踳也老狼有胡進則蹇其胡退則踳其尾孔疏云狼之老者頷下垂胡蓋狼爲山獸頷下懸皮爲胡胡垂如袋狼老則有之前行跋胡後退蹇尾是進退俱難也

毛詩多識卷七終

毛詩多識卷八

長白多隆阿著

小雅上

呦呦鹿鳴食野之苹

毛傳云苹萍也是蓋以苹爲水萍鄭箋云苹蘋蕭也是蓋以苹爲原草爾雅釋草云苹萍又云苹蘋蕭郭注云萍水中浮萍蘋蕭今之蘋蒿傳箋釋苹皆本爾雅箋又改傳作蛄者以萍爲水草非鹿所食故也陸疏云苹葉青白色莖似蓍而輕脆始生香可生食凡蒿之屬其臭多香而有清濁之別其香之近清者嫩皆可食鹿則不拘香之清濁皆食之王氏羣芳譜言一名藻一名水花引此詩句爲證而此詩明言在野不言在水萍之爲草浮於水面纖微細弱寥寥無幾鹿爲山中大獸萍有多少足供其食關左多鹿人家畜之亦從未見其食萍則萍爲蒿屬不爲水草無疑也蕭爲香蒿古人采之以供祭祀之

用萃之莖葉與蕭近似故有蕭名又以與蕭非一草故又別其名曰
賴本草言鹿食九草其中有白蒿齊頭蒿二種則萃蓋齊頭蒿耳

呦呦鹿鳴食野之蒿

毛傳云蒿藋也爾雅釋草云繁之醜秋爲蒿郭注云醜類也春時各
有種名至秋老成皆通呼爲蒿邢疏云此言繁蕭之類春始生氣味
既異故其名不同至秋老成則皆蒿也蓋蒿之種類最繁總名爲蒿
爾雅所載曰幡蒿卽白蒿曰蒿藋卽青蒿香可食曰蔚牡蒿卽青蒿
之不結子者曰艾冰臺卽艾蒿曰莧蘿卽莧蒿亦曰藪蒿曰賴蕭名
賴蒿卽首章之萃曰購蕭萑卽萑蒿亦名流蒿曰蕭萩卽香蒿可供
祭祀用者凡八種說文所載曰蒹蒿曰蒼蒿曰蔚蒿曰莧蘿曰蒹
蒿曰蔚牡蒿曰蕭艾蒿曰繁白蒿曰蓬蒿曰艾久臺此不言蒿以艾
之爲蒿人所習知也凡十種其曰藋曰莧曰蔚曰蕭曰繁曰艾者與
爾雅同而以蕭爲艾又曰艾冰臺則犯復蕭爲香草葉似藁本艾爲

灸草葉似菊花二草之性不同二草之形亦異也本草所載之蒿亦有數種與爾雅說文大概相同關左所有之蒿白蒿青蒿艾蒿香蒿之外其餘大半無名卽有俗名亦不雅馴要之凡蒿屬則鹿皆食之不必惟食藪也傳蓋舉其一以爲注耳

呦呦鹿鳴食野之芩

毛傳云芩草也而未釋芩爲何草本草謂鹿食九草餘則不食九草者葛葉鹿葱鹿藥白蒿水芹甘草齊頭蒿山耳齊苳也陸疏云芩草莖如釵股葉如竹蔓生澤中下地鹹處則是芩爲近水之草或云卽水芹水芹生澤畔葉似藁本而微整三月初萌布地生五月中抽莖枝歧出開細白碎花結子細如沙香而微辛春嫩莖葉采淪可食美勝他蔬夫鹿雖野獸取麋畜之則亦易馴居近東邊往往多用木檻爲圈養育以供玩賞者豆蘆木葉無所不食皆在九草之外本草之說不足據也

翩翩者雌載飛載下集于苞栩

毛傳云雌夫不也鄭箋云夫不鳥之謹愬者夫不一作鳩鴝爾雅釋鳥云佳其鳩鴝郭注云今鴝鳩此鳥又名鴝鳩鴝爲鴝音之轉又名錦鳩又名斑鳩蓋其形似鴝鴝大亦如之羽蓋灰色亦有青白斑點者此以羽色命名也嚴氏詩緝云雌一鳥而十四名雌佳其鴝鳩祝鳩鳩鴝鴝鳩鴝鳩楚鳩鴝鳩荊鳩乳鳩鴝鳩鴝鳩鴝鳩也其名雖多而今惟呼曰斑鳩斑鳩在關左四時皆見春夏多聲似咕咕格格四字拙於爲巢不能縝密惟取數十枝架於樹杪之間疎不蔽體人在樹下可仰見其卵力搖此樹卵或隕墜俗云天將雨鳩卽逐其雌晴則呼而返之又名搬鳩言能搬移其卵雛今有小兒升樹取之以俟其搬則竟不能此說殆不可信或名曰鳩婦則以兩逐之晴歸之也夫離巢本不密豈能蔽兩雌在平日宿惟棲樹至於伏卵始草草爲窠是累窠者爲雌鳩非雄鳩也逐雌之說亦未必然或名曰拙鳩此

鳩不善營巢則成拙矣方言以鵯鳩爲鵯鳩廣雅以鵯鳩爲戴勝鵯鳩爲鳴鳩戴勝爲鳴鳩皆誤春秋昭公十七年傳云祝鳩氏司徒也蓋以祝鳩性孝故以爲五鳩之首杜預注云祝鳩鵯鳩也鵯鳩孝故爲司徒主教民也是鵯爲孝鳥此詩取之以興將父言鵯集樹得所安止已勤主事不遑養親樹櫟也俗名尖柞見鵯羽

鵯鵯者鵯載飛載止集于苞杞

毛傳云杞枸櫞也爾雅釋木云杞枸櫞郭注云今枸杞也陸疏云枸櫞一名苦杞一名地骨春生作羹茹微苦其莖似莓子秋熟正赤莖葉及子服之輕身益氣夫枸杞爲小木多叢生故曰苞一名枸棘爲其枝有刺如棘又名天精又名地骨爲其入藥可以補精血壯筋骨也本草言春采葉名天精夏采花名長生草秋采子名枸杞子冬采根名地骨皮又名羊乳言枸杞之子甘如乳也枸杞一作苟杞一作句杞一作句已字畫小異耳詩緝云本草有枸杞名仙人杖一名西

王母杖羣芳譜云枸杞二木名此物棘如枸之刺莖如杞之條故兼
二名此木關左山中多有之春生葉如石榴而狹小幹高數尺枝弱
似蔓六七月開小紅紫花結實如棗核蒂長三四分餘纍纍盈枝熟
紅鮮潤光如珊瑚但味酸而苦不堪入藥李氏本草言陝之蘭州靈
州以西枸杞皆作大樹子圓如櫻桃紅潤甘美可作果食此爲枸杞
之別種陝西甘州枸杞子味甘不酢入藥爲上品陸氏又言杞爲柳
屬柳爲喬木樹非叢生豈得言苞此與將仲子無折於里牆者原非
一類易姤卦九五云以杞包瓜釋文以爲苟杞左氏昭公十二年傳
云我有圃生之杞社注杞枸杞易姤卦上乾下巽爲陰息陽消之卦
杞爲巽象巽爲木爲高巽木屬陰爲杞柳非枸杞左傳之杞言生於
圃枸杞生於野杜注亦不確也

我馬維駒

說文云馬二歲曰駒

我馬維騏

秦風小戎傳云騏騫文也蓋馬之青黑成文者

我馬維駱

爾雅釋畜云白馬黑鬣駱禮月令云駕白駱是駱爲馬之白色者明堂位云夏后氏駱馬黑鬣是馬身色白而鬣黑色曰駱也

我馬維駒

毛傳云陰白雜毛駒此本爾雅釋畜文

常棣之華鄂不韡韡

毛傳云常棣棣也鄂猶鄂鄂然言外發也韡韡光明也鄭箋云承華者曰鄂不當作栢鄂足也鄂足得華之光明則韡韡然盛爾雅釋木云常棣棣郭注云今關西有棣樹子如櫻桃可食或名棠棣蓋棠常同音常棣花葉亦似棠而小故有棠名本草名郁李言馥郁也花實俱有香氣故曰郁又作鬱六月食鬱爾雅詩所言者卽此也又名雀李

又名雀梅李梅皆象其實曰雀者小也言其實比梅李俱小其子入藥曰郁李仁此木關左最多高者不過三四尺抽條叢生無大樹夏初花葉齊放色白五出繁縟濃密結實肖李生青熟赤紫可采食酸而微澀不如園李甘美俗呼曰漚李漚爲郁鬱音聲之轉陸疏謂唐棣爲萸李一名雀梅一名車下李其花或紅或白六月中成實大如李子可食又謂常棣白棣樹也如李而小如櫻桃又有赤棣亦如白棣葉如刺楸而微圓子正赤如郁李而小五月始熟自關西天水隴西多有之詳繹陸氏說唐棣之形正是常棣蓋誤以常棣當唐棣也其言白棣實似櫻桃者與郭注略同郭言出於關西此亦言出於關西天水隴西關左關右土產多似今有呼漚李曰山櫻桃者山櫻桃酸而不澀形亦與櫻桃酷似此爲常棣之別種似一而實二也詩緝以常棣爲玉李未知其指而與唐棣並載嚴氏蓋無確見唐棣名移葉大如楊與常棣迥異詩中木屬字義相似者如唐棣之與常棣杏

梅之與柑梅枸杞之與梓杞未見其物徒據舊說往往牽混於以知考察物類多聞不如多見矣

脊令在原

毛傳云脊令雛渠也飛則鳴行則搖不能自舍耳爾雅釋鳥云鷓鴣雛雛是脊令又作鷓鴣一作鷓鴣別名雛渠又作雛鷓又作鷓渠鄭箋云雛渠水鳥而今在原失其常處則飛則鳴求其類天性也夫則飛則鳴猶小宛所謂載飛載鳴飛不已鳴亦不已故郭注爾雅謂其飛則鳴行則搖也漢書東方朔傳云若鷓鴣飛且鳴矣顏師古注云鷓鴣雛渠小青雀也飛則鳴行則搖言其勤苦也禽經言脊令友悌凡共母者飛鳴不相離詩中兩言脊令皆喻兄弟故箋謂求其類因此見詩人詠物各有深意以脊令言兄弟與鷓鴣興將父將母之義正同是知不識物性不可以說詩也陸疏云脊令大如鷓鴣雀長腳長尾尖喙背上青灰色腹下白頸下黑如連錢故杜陽人謂之連錢說

文云雅石鳥一名雛鵲一曰精列是雅石鳥精列又爲脊令別名段氏注云精列脊令字音之轉詩緝云脊令雪姑也山陰陸氏云鵲鵲錢母物類相感志云俗呼雪姑其色蒼白鳴則天將大雪極驗是雪姑錢母亦爲脊令別名雛渠也連錢也石鳥也精列也錢母也雅也脊令之別名有六也關左每於河溪之側見有小鳥大如雀灰白色喙下有黑圓文腳尾微長飛則唧留作聲似脊令兩字之音止於地則尾急搖俗呼曰顛尾雀卽此鳥也但於春夏水暖時則有之冬寒則不見其名雪姑鳴應降雪在北地殊不然此詩不言其飛言其在原是取行則搖有不安之意以興下兄弟急難焉

采薇采薇

毛傳云薇菜也卽野豌豆見草蟲

彼爾維何維常之華

毛傳云爾華盛貌常常棣也說文引此詩爾作蕭亦訓華之盛常卽

郁李見常棣

象弭魚服

毛傳云魚服者魚皮也孔疏云魚服言以皮爲矢之服今俗所用之箭袋陸疏云魚獸之皮魚獸似猪東海有之一名魚鼈其背上斑文腹下純青以爲矢服雖已乾燥而海水將潮及天將雨其毛皆起潮回天晴其毛復如故雖在數千里之外可以知海水之潮其氣自相感也郭景純江賦云魚則江豚海豨注引南越志云江豚似猪海豨豕頭身長九尺關左東南臨海魚皮之可爲器者沙魚最貴次則爲海狗海豚陸言魚獸似猪似指海豚又名魚鼈似指海狗海狗大者數十斤脂油可燃燈皮可製器狗頭魚尾前有二足毛細色黃水陸皆居本草名曰溫腠沙魚海豚皆無毛有毛之魚皮似指海狗也

昔我往矣楊柳依依

毛傳云楊柳蒲柳也見車鄰

黍稷方華

黍稷穀名見黍離

嘒嘒草蟲趨趨阜蟲

草蟲阜蟲皆蟲名見草蟲

倉庚喈喈采芣祁祁

倉庚黃鳥繫白蒿倉庚見葛覃繫見采芣

有杕之杜有皖其實

杜赤棠山梨之赤者見甘棠

陟彼北山言采其杞

鄭箋云杞非常菜也而升山采之託有事以望君子此杞爲枸杞非杞柳杞柳無實枸杞有實有實始可言采故此杞宜爲枸杞也箋以杞爲菜孔疏亦以爲杞木之菜蓋枸杞之嫩葉可茹古以爲蔬

鮮羔

毛傳云鰐揚也鰐鮓也是言鰐又名揚鰐又名鮓古今稱名各異鰐
揚鰐鮓又皆以本韻字爲訓陸疏云鰐一名揚今黃鰐魚本草云黃
鰐一名缺鰐無鱗埤雅云缺鰐魚其臍春夏近上秋冬近下正字通
云鰐身尾似鮓腹黃背青臍下二橫骨兩鬚羣游作聲軋軋然一名
黃鰐一名黃鰐蓋此魚名揚名缺皆鰐之同音字黃鰐黃鰐是言此
魚之色其鰐類異於他魚故以鰐類名之黃鰐者言此魚鰐骨之聲
軋軋也鰐爲處處恆有之魚無鱗黏滑手不可捉身色黃背青
鰐骨橫互作聲禮月令獺祭魚取用爲祝者卽鰐也陸佃謂鰐爲黃
鰐魚性浮而善飛躍故曰揚陸璣亦曰鰐身形厚而長骨正黃魚之
大而有力解飛是皆以揚爲飛因鰐名揚泥執字義附會言之不知
鰐非罕見之物其大者長三四尺本不能躍又焉能飛其皮色黃而
黃不在骨本無鱗非其鱗之黃關左俗呼曰黃昂昂與揚義相近鰐
行水中鰐邊兩刺緊貼其腹一入網罟則兩刺昂然橫互遞網而回

俗又呼昂刺又呼曰回網魚俗名旣象其形又得其性網不能取惟罾可獲之又有大而色青者俗名牛尾昂味鮮肥肉極細膾亦貴重可珍如以鱗爲大魚又能飛揚焉有許大之罾而鱗麗之哉鯊一名鮪見爾雅郭注云今吹沙小魚孔疏引陸疏云魚狹而長常張口吹沙故曰吹沙夫陸疏原有鯊似鯽魚一語而孔疏削去之孔氏蓋識此魚形色不類鯽也通雅云鯊吹沙小魚黃皮黑斑正月先至身前半闊而扁後方而狹陸氏以爲狹小非也夫鯊多出於山溪頭尾俱圓未見前扁後方者此注不的也嚴氏詩緝引字指云鯽鯊屬異物曰吹沙長三寸許背上有刺螫人蓋鯊爲魚之小者長半尺餘頭至尾粗細略同兩目外凸厚肉細鱗黃白色有黑點文尾不岐冬蟄於沙立夏後始出求食沙河中皆有背有刺不螫人並非異物其說皆誤羅願又以鯊爲重脣魚脣厚如鼃鼃夫重脣爲大魚大者至十餘斤身長白鱗肉中有刺味亞於鯉脣似雙脣與鼃迥異與鯊尤不

類也然非上品魚俗呼曰沙籠輪魚

魴鱧

毛傳云魴魴也魴非上品魚處處皆有魴爲鰕花見汝墳魴之別名亦不一魴字亦各異爾雅釋魚云鰕大魴小者魴邢疏云此卽魴也其大者名鰕小者名魴說文魴作魴亦注曰魴廣雅魴作魴本草作魴注曰魴魚郭注爾雅亦曰魴魴也是魴別名魴諸家注釋皆同圖經又名黑魴埤雅又名元魴則以此魚色黑故名黑名元元亦黑色也陶氏本草注言魴爲公螭蛇所化性至難死猶有蛇性然此魚多居深澤大者二三十斤形長體圓黑色大鱗花文似蟒有鬚鬣尾頭上有七小孔如北斗星象亦有子生小魚不必盡屬蛇化也俗云魴魚有毒然人亦常食之不甚甘鮮呼曰黑魚此魚陶云蛇化其頭似蛇鱗花亦近似力最大長至三四尺者一人不能提取俗呼曰黑魚棒言其能跳以尾擊人也詩緝謂魴卽今之黑鯉魚蓋以名魴又名

鱖鱖皆鯉之同音字故誤合爲一此詩下章有鯉不應犯複又不宜
鱖鯉異字也

鯉

毛傳云鯉鮎也爾雅釋魚云鯉郭注云今額白魚此魚形窄腹扁鱗
細白而有光如銀煥色頭尾向上長二三尺餘頗似東海之鱮南江
之鱖味極鮮美食品所珍關左東北諸大江皆有之史記周本紀武
王渡孟津白魚入舟卽鯉也爾雅鯉鮎連文本屬兩魚傳誤合之謂
鯉卽是鮎郭氏謂鮎名鯉江東呼之爲鱖與鯉爲非一物說文亦以
鯉爲鮎承訛久矣山陰陸氏云鱖魚黃魴魚青鯉魚黑鯉魚白鯉魚
赤鯉魚小魚魴鯉中魚鯉鯉大魚鱖魚長魚魴鯉則一方一圓鯉鯉
則一俯一仰鱖魚魴其性浮鯉鯉其性沈詩緝云此意謂五色之
備而大小長短浮沈之不同也然詩人言鱖魚魴鯉鯉鯉不過如潛
頌有鱖有魴有鯉鯉多著魚名以見魚之多非謂止有此六魚也

此六魚一一爲說則潛六魚又皆有說乎鰕鱉大小猶有未定不必泥可也夫嚴氏僅駁陸氏配合六魚似失而不知其說亦多有難通者其言六魚之色何以遺鰕而魴魚色白亦不青也鰕有大至十餘斤者本非小魚鰕之大者長四五尺不得言中鱣之大不及鰕遠甚何以言大鰕性極沈鯉或浮水而行好作異說不求義理之安未見此六物者幾何不入於十里霧中邪是自誤兼誤人矣

南有嘉魚

毛傳云江漢之間魚所產也鄭箋云南方水中有善魚此皆言魚之嘉而未言嘉魚爲何魚蓋嘉魚一名鮠魚一名拙魚一名丙穴魚李氏本草云嘉美也杜甫詩魚知丙穴由來美是矣河陽呼爲鮠魚言味之美也蜀人呼爲拙魚言其性鈍也夫丙穴有二文選注云丙穴在漢中沔縣北丙地名也水經注云丙水出丙穴穴口向內故名魚常以三月出穴十月入穴任豫益州記云嘉魚蜀郡處處有之狀似

鯉而鱗細如鯽肉肥而美夔州志云嘉魚春社前出秋社後歸首有黑點長身細鱗肉白如玉味頗鹹食鹽泉故也范成大虞衡志云嘉魚狀如鯽而多脂味極美劉侗嶺表錄云蒼梧戎縣江水日出嘉魚似鯽而肥衆魚莫及王士正池北偶談云嘉魚出丙穴在漢中府桃花時則從穴出亦名鮓魚或名鮓爾雅曰鮓當鮓郭注云海魚似鮓而大鱗肥美多鮓今江東呼最大長三尺者曰當互此魚或言出於蜀或言出於楚或言出於秦或言出於江海則是所出之地不一或言似鯉或言似鮓或言似鮓則是所言之形狀不一惟王氏言其似鮓卽爾雅之鮓當鮓大鱗多鮓與海鮓相似海鮓今俗名火鮓魚又呼曰科鮓魚味甘而美可敵南江之鮓脂肥而鮮足埒北江之鯉稱之曰嘉不虛也其名曰鮓曰鮓曰當鮓則是實有此魚非言南有美魚泛泛無所指也

南有樛木甘瓠繫之

詩緝云瓠有甘有苦甘瓠則可食者也夫瓠爲菰屬古今皆以爲蔬
漢書食貨志云菜茹有畦瓜瓠果蓏正字通云瓠瓜類分甘苦二種
甘者大苦者小陶氏云瓠或有苦者味如胆不可食非別生一種也
埤雅云長而瘦上曰瓠短項大腹曰匏瓠性甘匏性苦蓋匏老則皮
堅可以爲器而瓠雖至老其皮不堅此匏瓠二物之別匏形不一或
圓或扁或長項大腹或首末俱大而腰轉細瓠之形或長或短圓長
似方而無稜角如枕形三月間蔓長葉大五六月開白花實在花下
結實肥大嫩可烹食味甘而淡俗名瓠子凡瓜蓏之屬蔓依於地則
結實少蔓附於空則結實多瓠纍櫟木亦取實多之意古之瓜蓏寄
於樹今則豎木爲架尤工於古瓠味不苦如遇天旱瓜之類或有苦
者此氣候所致非別有此一種也

翩翩者雌燕然來思

毛傳云雌壹宿之鳥鄭箋云壹宿者壹於所宿之木也蓋雌爲五鳩

之一古帝以鳥紀官離爲祝鳩氏也他鳩來去無定惟祝鳩四時常有不移其處故曰壹宿傳箋四牡之詩詁離性孝以興將父將母此詁離壹宿以興下文又燕嘉賓也

南山有臺北山有萊

毛傳云臺夫須也萊草也爾雅釋草云臺夫須又曰滿侯莎其實媞釐蔓華又曰拜蒨藟郭注云臺可以爲禦雨笠滿也者莎蒨媞者其實蔓華一名蒙華蒨藟亦似藜蓋臺卽莎草滿侯莎是言滿又名莎媞爲莎草實廣雅云地毛莎蒨也文選注云一名戾莎說文云滿侯也一名侯莎爾雅翼云莎莖葉似三稜根周匝多毛謂之香附子莎葉如韭而長光澤有劍脊稜五六月間葉中抽莖高二三尺餘莖端小葉叢聚開青花結細子莖三稜俗呼爲三稜草根入藥有香名而香味極微無芬芳氣也嚴氏詩緝云以莎草爲衣則謂之簑莎爲草名簑爲衣名莎草又可爲笠此草農人常取之織雨衣故小雅都人

士詩臺笠緇撮毛注謂臺所以禦暑笠所以禦雨鄭箋以爲都人之
士以臺草爲笠言笠爲臺草所織可禦暑又可禦雨傳則分言其用
究之爲一物也郭氏爾雅注謂笠卽雨衣之類然笠戴於首今俗呼
曰斗篷衣著於身今俗呼曰簑衣二物雖同用臺草織成其用則不
同也關左水澤之地多生莎草其根連續相附如棗核形兩頭尖采
者暴乾以充藥材名香附子羣芳譜云香附子莎草根也一名水莎
一名地毛一名水香稜一名地巴戟古謂之雀頭香萊卽藜又作釐
爾雅釐蔓華說文作萊蔓華徐鍇以釐萊爲同音字是也夫釐萊二
字古爲同音而亦通用劉向封事引詩貽我來牟作釐牟春秋隱公
十一年夏公會鄭伯于時來公羊傳作會于祁黎來萊同韻黎藜同
韻則是爾雅之釐卽說文之萊釐又作藜是萊爲藜草無疑也玉篇
云藜草也廣韻同詩曰田卒汙萊禮月令云藜莠蓬蒿並興欲識萊
者尋彼荒田中則得之陸疏云萊草名其葉可食今兗州人蒸以爲

茹謂之萊蒸則是萊爲可食之草春氣初暖萊草始生采嫩苗者淪之爲茹亦常有之但不養人食之久則體浮腫或小泄本草未言萊毒而食者無益則如此詩緝云萊草葉可食以上下類之皆指草木之名其義或當然矣不知此草處處皆有人人習見嚴氏注詩竟不能識又引朱氏說萊葉有香豈知此草性最寒滑無香氣哉李氏本草萊入菜部園圃廣有不種自生有青紫二種青者莖葉俱青莖微方似有稜葉似茹而薄小外有粗齒面綠背白似有灰七月開細青花結實簇簇如毬中有細子光黑如漆紫者莖有紫線文葉之背色亦紫老莖高七八尺餘可作牀棧及爲杖管幼安之藜牀山濤母之藜杖皆用紫萊之老梗也藜藜卽藜之紫色者一名拜邵氏爾雅正義云今灰藜莖有紅縷葉銳而青其背白如著沙羣芳譜云藜一名地膚一名落帚則是以俗之千頭草當藜也地膚不生於荒田枝葉上生秋老作帚爲農家必需之物而其形與萊毫不似也萊葉之背

有灰似沙用水洗下浣布最易潔白俗呼曰灰菜

南山有桑北山有楊

桑楊俱木名桑見定之方中楊見車鄰

南山有杞北山有李

曹氏曰杞梓杞也杞柳生澤畔不生於山而梓杞爲大木山中有之
陸疏云杞一名狗骨山材也其樹如檇理白而滑子爲木蠹可合藥
李木果名見何彼穠矣

南山有栲北山有杻

毛傳云栲山栲杻櫨也栲卽臭椿杻俗名紐筋子俱見山有樛

南山有枸北山有楸

毛傳云枸枳枸也楸鼠梓孔疏云枸釋木無文宋玉賦曰枳枸來巢
則枸木多枝而曲所以來巢也爾雅釋木云楸鼠梓郭注云楸屬也
今江東有鹿梓陸疏云枸山木一名枸骨木理白滑可爲函板子大

如指噉之甘美如飴江南特美謂之木蜜其木能令酒薄若以爲屋柱一室之內酒皆少味也枸一作榦禮婦人之贊根榛脯脩棗栗疏云榦卽白石李形如珊瑚味甘美李氏本草云枸骨樹如女貞肌理甚白葉長二三寸青翠而厚四時不凋夏開白花實如蕤荑子秋熟色緋紅皮薄味甘核有四瓣葉有五刺如貓之形俗呼爲貓兒刺說文云榦鼠梓木廣韻云鼠梓似山楸而黑陸疏亦言榦木理如楸山楸之異者一名苦楸溼時脆燥時堅此二木關左未見宋玉風賦枳枸作枳句六臣注云枳木名枳句言枳樹多勾似橘屈曲也考工記曰橘踰淮爲枳此言枳卽是橘踰淮而化不似陸疏所言木蜜之枸骨也榦爲鼠梓鼠李亦名鼠梓鼠李葉似梨而薄小子如黃柏子木白而堅實俗名臭李可食而澀亦非似楸之榦梓也

蓼被蕭斯

毛傳云蕭蒿也卽今香蒿見采蒿

在彼杞棘

杞枸杞見四牡棘酸棗見凱風

其桐其椅其實離離

桐椅大木皆有實見定之方中

菁菁者莪在彼中阿

毛傳云莪蘿蒿也爾雅釋草云莪蘿郭注云今莪蒿亦曰蘿蒿李氏本草云莪猶莪莪言莪蒿高於他蒿也陸疏云莪蒿也一名蘿生澤田漸洳之處葉似邪蒿而細科生三月中莖可生食又可蒸食香美頗似蘿蒿夫莪在關左處處皆有葉似蕭而香不濃莖似蔚而皮不滑叢生高隰亦生山側莖冬不死高可五六尺餘詩言在阿在陵未嘗惟言在汴陸氏胡未之察也莪科高於衆蒿先百草生每叢凡數莖詩言菁菁者以喻當年養育人材如莪之盛

魚鼈膾鯉

爾雅釋魚云鼃三足爲能蓋鼃爲常物此特卽其異者釋之說文云鼃甲蟲也考工記注云外骨龜屬內骨鼃屬玉篇云鼃龜屬一名神守一名河伯從事埤雅云鼃以眼聽穹脊連脅水居陸生淮南子云鼃無耳而目不可暫精於明也陸佃曰鶴影生鼃思生鼃伏於淵而卵剖於陵以思化也此物凡池澤江河皆有俗呼曰甲魚

薄言采芑

毛傳云芑菜也孔疏引陸璣疏云芑菜似苦菜莖青白色摘其葉白汁出肥可生食亦可蒸爲茹青州人謂之芑河西雁門芑尤美詩緝云芑嘉穀也李氏云毛以薄言采芑爲菜豐水有芑爲草維縻維芑爲穀王氏皆以爲穀補傳云新田舊畝中鄉不應指菜蓋以田畝善養嘉穀喻周家善養士卒也夫田中固宜有穀而田中亦自有芑芑言采則芑爲菜可知也是蓋言菜采於田隼集於地喻方叔習兵有法也芑爲茶屬疏言似苦菜芑與苦菜小異葉比苦菜肥大亦不似

苦菜細碎春貼地生秋從中抽莖高至二三尺開黃花似菊而小花乾結子如蘆花而遠飛田中廣有可以生食亦可熟食茶之秀在四月芭之秀在七月此芭與茶之別也芭名苦蕒菜俗訛爲曲麻菜

歛彼飛隼其飛戾天

毛傳云戾至也鄭箋云隼急疾之鳥也飛乃至天喻士卒勁勇能深攻入敵也蓋隼爲鷲鳥關左呼曰雀鷹埤雅云鷹搏噬不能無失惟隼爲有準故準字從隼一名晨風隼之飛如風之疾故有風名一名鳶字從弋爲隼捉雀如弋之射秦詩云歛彼晨風大雅詩云鳶飛戾天曰歛曰戾天文義與此詩同是一物也隼又名負雀爾雅釋鳥云鵙負雀郭注云鵙也江東呼之爲鵙善捉雀因名云陸疏云隼鵙屬齊人謂之擊征或謂之題肩或謂之雀鷹春化爲布穀者是也易解卦上六云公用射隼于高墉之上疏云隼者貪殘之鳥鵙鵙之屬魯語仲尼在陳有隼集於陳侯之庭注云隼鷲鳥今之鵙也夫隼似蒼

鷹而小與鷂相類不似鷂鷂大而隼小隼圓目鉤喙黃足利爪其尾如舵背羽青灰色腹下白蒼斑文善高飛疾如射飢捕雀食每當春深雀鷹初至里人網設四面其中繫雀作圖給鷹來捕觸機網翻鷹覆網下捉而畜之以觀其捉雀爲戲其稚者名花鷹又名松兒老者名板鷹皆不知其命名之義而此鳥則常見之詩經云隼鷂也鷂屬也蓋言隼爲鷂類則可而謂隼卽是鷂則非隼之類不一其名亦分類而異禽經云善搏者曰鷹竊立者曰鷂骨曰鷂臑曰鷂展曰鷂奪曰鷂鷂卽晨風鷂名鷂鷂鷹捉鳥以爪鷂擊鳥以翅鷂之猛厲尤捷於鷹鳥鷂之屬皆畏之隼非鷂嚴說誤也說文云隼祝鳩也祝鳩爲鷂卽斑鳩鳥之最謹愿者豈爲鷂鳥爾雅鷹隼醜祝鳩毫不似鷹也或以隼爲茅鷂茅鷂爲老鷂臬之屬其誤尤遠或曰隼鷂鳩也此因月令有鷹化爲鳩之文鷂鳩亦有鳩名故誤合之豈知隼有數名皆不名鳩而化鳩者正此鳥邪隼爲常有之鳥而諸家或曰鷂屬或曰

鷩屬或曰鷩或曰鷩或曰茅鷩或曰鷩鷩鷩鷩之類幾乎猜鷩鷩非鷩鷩而許氏以之當雉尤足駭異此詩曰鷩曰戾天蓋求此物詳觀之何必爲此空測也布穀爲鷩鷩非雉所化雉所化者爲鷩鷩也陸說亦誤

獸之所同應鹿麋麋

毛傳云鹿牝曰應爾雅釋獸云鹿牝麋牝應是應卽鹿之牝者今牝鹿無角色黃無斑白點與牡鹿毛色異

發被小狔羴此大兜

鄭箋云豕牝曰狔蓋野豕也見羴虞說文云兜如野牛青色其皮堅厚可制鎧李氏本草云犀字篆文象形其特名兜兜出西番南番滇南交州諸處有山兜水兜兜犀三種山兜居山林獲之尙易水兜出水中最爲難得俱有二角兜犀亦曰沙犀祇一角在頂文理細膩斑白分明其力最大不易獵取漢書平帝元始二年黃支國獻犀牛顏

師古注云犀狀如水牛頭似猪而四足類象黑色一角當額前鼻上
又有一小角爾雅釋獸云兕似牛犀似豕郭注云兕一角青色重千
斤犀形似水牛豬頭大腹卑腳有三角一在頂上一在額上一在鼻
上鼻上者卽食角也小而不備好食棘亦有一角者夫李氏謂犀之
特者名兕犀兕似爲一物爾雅兕犀分釋則是犀爲二物此物出於
西南徼外北方藥材雖用犀角而未見此獸顏氏注漢書言犀狀似
水牛非水牛卽犀也犀兕相似非一類矣

鴻雁于飛肅肅其羽

詩中有單言雁者如離騷鳴雁弋鳥與雁之類乃隨陽之鳥也又名
陽鳥書曰陽鳥攸居詩中有單言鴻者如鴻則離之鴻飛連渚之類
此爲鴻鵠又名黃鵠形頗似鶴又名黃鵠與雁異若鴻雁連言則鴻
爲雁之大者毛傳云大曰鴻小曰雁如禮月令孟春季秋所言鴻雁
則鴻皆雁也亦有單言鴻而非鵠者如周易漸卦六言鴻漸鴻皆是

雁此不可以詩中之鴻例之

歟彼飛隼載飛載止

隼鷩鳥卽雀鷹見采芑

毛詩多識卷八終